



唐十二家詩集 孟浩然


柒



內閣文庫		
番號	漢	3808
冊數	10 ( 7 )	
函號	319	141







孟浩然集目錄

五言古詩

尋香山湛上人

聞符公蘭若最幽與薛八同往

宿天台桐栢觀

宿終南翠微寺

春初漢中漾舟

宿山房期丁大不至



耶溪泛舟

彭蠡湖中望廬山

登鹿門山懷古

遊明禪師西山蘭若

聽鄭五惲彈琴



疾愈過龍泉寺精舍呈易業二上人

襄陽旅泊寄閻九司戶 大堤行寄萬七

還山贈湛禪師 秋登萬山寄張五

登江中孤嶼贈白雲先生王迴

晚春卧疾寄張八子容 書懷貽京邑故人

遊雲門寺寄越府包戶曹徐起居

示孟郊 山中逢道士雲公

歲暮海上作 越中逢天台太一子

自潯陽汎舟經明海作 早發漁浦潭

經七里灘

南陽北阻雪

將適天台留別臨安李主簿

適越留別譙縣張主簿申屠少府

送從弟邕下第後歸會稽

送辛大之鄂渚不及 江上別流人

洗然弟竹亭 宴鮑二宅

夜登孔伯昭南樓 峴潭作

齒坐呈南山諸隱 與王昌齡宴黃十一

襄陽公宅飲 同張明府清鏡嘆

夏日南亭懷辛大

秋宵月下懷

仲夏歸南園寄京邑舊遊

家園卧疾畢太祝見尋 田家元日

晚泊潯陽望香爐峰 萬山潭

入峽寄弟 宿揚子津寄劉隱士

送丁大鳳進士赴舉呈張九齡

送吳悅遊韶陽 送陳七赴西軍

田家作 登望楚山竄高頂

從張丞相遊紀南城獵戲贈裴迪張參軍

擬雜作

早梅

澗南園即事貽皎上人 王迴見尋

與黃侍御北津汎舟 題長安主人壁

庭橘

七言古詩

夜歸鹿門歌 鸚鵡洲送王九游江左

和盧明府送鄭十三還京兼寄之

送王七尉松滋得陽臺雲

高陽池送朱二

五言律詩

與諸子登峴山

臨洞庭

晚春

歲暮歸南山

梅道士水亭

閒園懷蘇子

留別王維

武陵泛舟

同曹三御史泛湖歸越

遊景空寺蘭若

陪張丞相登嵩陽

與顏錢塘登樟亭望潮作

題義公禪房

尋白鶴品張子容隱居

九日

除夜樂城張少府宅

舟中晚望

與薛司戶登樟亭驛

遊精思觀迴王白雲在後

尋天台山作

宿立公房

尋滕逸人故居

姚開府山池

夏日泛舟過滕逸人別業

夏日辨玉法師茅齋

與張折衝遊耆闍寺

與白明府遊江

遊精思題觀主山房

尋梅道士

陪姚使君題惠上人房

晚春遠上人南亭

遊鳳林寺西嶺

人日登南陽驛門亭子懷漢川諸友

陪獨孤使君同與蕭員外證登萬山亭

贈道士參寥

京還贈張維

題李十四莊兼贈綦母校書

寄趙正字

秋登張明府海亭

題融公蘭若

九日龍沙寄劉大

洞庭湖寄閻九

和李侍御渡松滋江

秦中感秋寄上人

重酬李少府見贈

宿永嘉江寄山陰崔國輔少府

上巳日洛中寄王迴

聞裴拙自襄州司戶除豫州司戶因以投寄

江上寄山陰崔少府

送洗然弟進士舉

夜泊廬江聞故人在東林寺以詩寄之

宿桐廬江寄廣陵舊遊

南還舟中寄袁太祝

東陂遇雨率爾貽謝南池

行至汝墳寄盧徵君

寄天台道士

和張明府登鹿門山

和張三自穰縣還遇雪

歲除夜會樂城張少府宅

自洛之越

歸至郢中宅

途中遇晴

蔡陽館

他鄉七夕

半泊趁薛八船不及

曉入南山

夜渡湘水

赴命途州遇雪

宿武陵即事

同盧明府餞張郎中除義王府司馬海園作

永嘉上浦館逢張子容 送張子容赴舉

送張參明經舉兼向涇州省覲

泝江至武昌

唐城館早發寄楊使君

陪李侍御謁聰禪上人 和張丞相春朝對雪

送吳宣從事 送張祥之房陵

送桓子之郢城過禮 早春潤州送弟還鄉

送告八從軍 峴山餞房瑄崔宗之

送元公之鄂渚尋觀主張驂鸞

送王五昆季省覲 送崔易

送盧少府使入秦 送謝錄事之越

洛下送奚三還揚州 送袁十嶺南尋弟



永嘉別張子容

送袁太祝尉豫章

都下送辛大之鄂

送席大

送賈昇主簿之荊府

送王大校書

浙江西上留別裴劉二少府

京還留別新豐諸友

廣陵別薛八

臨渙裴明府席遇張十一房六

盧明府早秋宴張郎中海園即事

同盧明府早秋夜宴張郎中海亭

崔明府宅觀妓

宴榮山人池亭

夏日宴衛明府宅

清明日宴梅道士房

寒食宴張明府宅

和賈主簿九日登峴山

宴張別駕新齋

李氏園卧疾

過故人莊

途中九日懷襄陽

初出關旅亭夜坐懷王大校書

李少府與王九再來

尋張五

張七及辛大見訪

題張野人園廬

過故融公蘭若

早寒江上有懷

南山下與老圃期種瓜

裴司空見訪

除夜

傷峴山雲表上人

賦得盈盈樓上女

春怨

閨情

寒夜

美人分香

七言律詩

登安陽城樓

歲除夜有懷

登萬歲樓

春情

五言律詩

西山尋辛諤

過吳張二子檀溪別業

陪張丞相自松滋東泊渚宮

陪盧明府泛舟迴峴山作

陪張丞相祠紫蓋山途經玉泉寺

臘月八日於剡縣石城寺禮拜

同獨孤使君東齋作  
峴山送朱去非遊巴東

宴張記室宅  
登龍興寺閣

登總持寺浮圖  
本閣黎新亭作

與崔二十一遊鏡湖寄包賀二公

長安早春

秦中苦雨思歸贈袁左丞賀侍郎

陪張丞相登荊州城樓因寄蘇臺張使君及浪泊

戍主劉家

荆門上張丞相

和宋太史北樓新亭

夜泊宣城界

奉先張明府休沐還鄉海亭宴集

贈蕭少府

同王九題就師山房

上張吏部

下瀨石

和于判官登萬山亭因贈洪府都督韓公

行至漢川作

又滯越中贈謝南池會稽賀少府

盧明府九日峴山宴袁使君張郎中崔員外

送韓使君除洪府都督 崔明府宅夜觀妓

韓大侯東齋會岳上人諸學士

初年樂城館中臥疾懷歸

上巳日澗南園期王山人陳七諸公不至

送莫氏甥兼諸昆弟從韓司馬入西軍

峴山送蕭員外之荊州 送王昌齡之嶺南

五言絕句

宿建德江

春曉

送朱大入秦

送友人之京

初下浙江舟中口號

醉後贈馬四

檀溪尋古

同張將薊門觀燈

峴山亭寄晉陵張少府

口號贈王九

同儲十二洛陽道中作

尋菊花潭主人不遇

張郎中梅園作

問舟子

楊子津望京口

北澗泛舟

洛陽訪袁拾遺不遇

送張郎中遷京

戲贈主人

七言絕句

過融上人蘭若

涼州詞二首

越中送張少府歸秦中

濟江問同舟人

送杜十四之江南

孟浩然集

江東孫仲逸野臣校

五言古詩

尋香山湛上人

朝游訪名山，山遠在空翠。  
氛氲亘百里，日入行始至。  
谷口聞鐘聲，林端識香氣。  
杖策尋故人，解鞍暫停騎。  
石門殊壑險，篁迳轉森邃。  
法侶欣相逢，清談曉不寐。  
平生慕真隱，累日探靈異。  
野老朝入田，山僧暮歸寺。  
松泉多清響，苔壁饒古意。  
願言投此山，身世兩相棄。

雲門寺西六七里聞符公蘭若最幽與薛八  
同往

謂余獨迷方逢子亦在野結交指松柏問法尋蘭若  
小溪劣容舟怪石屢驚馬所居寂幽絕所住皆靜者  
密篠夾路傍清泉流舍下上人亦何閒塵念俱已捨  
四禪合真如一切是虛假願承甘露潤喜得惠風洒  
依止此山門誰能效立也一云雲簇興坐  
隅天空落階下

宿天台桐栢觀

海行信風帆夕宿逗雲島緬尋滄洲趣近愛赤城好

捫蘿亦踐苔輟棹恣探討息陰憇桐栢採秀尋芝草  
鶴唳清露垂鷄鳴信潮早願言解纓紱從此去煩惱  
高步凌四壁玄蹤得三老紛吾遠遊意學此長生道  
日夕望三山雲濤空浩浩

宿終南翠微寺空上人房

翠微終南裏雨後宜返照閉關久沈冥杖策一登眺  
遂造幽人室始知靜者妙儒道雖異門雲林頗同調  
兩心喜相得畢景共談笑暝還高窓眠時見遠山燒  
緬懷赤城標更憶臨海嶠風泉有清音何必蘇門嘯

春初漢中漾舟

漾舟逗何處神女漢皋曲雪罷冰復開春潭千丈綠  
輕舟恣來往探翫無厭足波影搖妓釵沙光逐人目  
傾杯魚鳥醉聯句鶯花續良會難再逢日入須秉燭  
宿叢師山房期丁大不至

夕陽度西嶺群壑倏已暝松月生夜涼風泉滿清聽  
樵人歸欲盡烟鳥棲初定之子期宿來孤琴候蘿籟  
耶溪泛舟

落景餘清輝輕橈弄溪渚澄明愛水物臨泛何容與

白首垂釣翁新粧浣紗女相看未相識脉脉不得語

彭蠡湖中望廬山

太虛生月暈舟中知天風挂席候明發渺漫平湖中  
中流見匡阜勢壓九江雄黯黯凝黛色崢嶸當曙空  
香爐初上日瀑水噴成虹久欲追向子况茲懷遠公  
我來限于役未暇息微躬淮海途將半星霜歲欲窮  
寄言巖棲者畢趣當來同

登鹿門山懷古

清曉因興來乘流越江峴沙禽近方識浦樹遙莫辨

漸到鹿門山山明翠微淺巖潭多屈曲舟楫屢迴轉  
昔聞龐德公採藥遂不返金澗養芝朮石牀卧苔蘚  
紛吾感耆舊結纜事攀踐隱迹今尚存高風邈已遠  
白雲何時去丹桂空偃蹇探討意未窮迴艫夕陽晚

遊明禪師西山蘭若

西山多奇狀秀出傍前楹停午收綵翠夕陽照分明  
吾師住其下禪坐說無生結廬就嵌窟剪竹通逕行  
談空對樵叟授法與山精日暮方辭去田園歸冶城

聽鄭五惛彈琴

阮籍推名飲清風坐竹林半酣下衫袖拂拭龍唇琴  
一杯彈一曲不覺夕陽沈余意在山水聞之諧俗心

疾愈過龍泉寺精舍呈易業二上人

傳午聞山鐘起行散愁疾尋林採芝去轉谷松蘿密  
傍見精舍開長廊飯僧畢石渠流雪水金子耀霜橘  
竹房思舊遊過憇終永日入洞窺石髓傍崖採蜂蜜  
日暮辭遠公虎溪相送出

襄陽旅泊寄閻九司戶

桂水通百越扁舟期曉發荆門蔽三巴夕望不見家



襄王夢行雨才子謫長沙長沙饒瘴癘胡為苦留滯  
久別思歎顏承歡懷接袂接袂杳無由徒增旅泊愁  
清猿不可聽沁月下湘流

大堤行寄萬七

大堤行樂處車馬相馳突歲歲春草生踏青二三月  
王孫挾珠彈遊女矜羅襪携手今莫同江花為誰發

還山贈湛禪師

幼聞無生理常欲觀此身心迹罕兼遂崎嶇多在塵  
晚途歸舊壑偶與支公鄰喜得林下契共推席上珍

念茲泛苦海方便示迷津導以微妙法結為清淨因  
煩惱業頓捨山林情轉殷朝來問疑義夕話得清真  
墨妙稱古絕詞華驚世人禪房閑虛靜花藥連冬春  
平石藉琴硯落泉洒衣巾欲知明滅意朝夕海鷗馴

秋登萬山寄張立

壯山白雲裏隱者自怡悅相望始登高心隨飛鴈滅  
愁因薄暮起興是清秋發時見歸村人平沙渡頭歇  
天邊樹若薺江畔洲如月何當載酒來共醉重陽節

登江中孤嶼贈白雲先生王迥

悠悠清江水水落沙嶼出回潭石下深綠篠岼傍家  
鮫人潛不見漁父歌自逸憶與君別時泛舟如昨日  
夕陽開晚照中坐興非一南望鹿門山歸來恨相失

晚春卧疾寄張八子容

南陌春將晚北窓猶卧病林園久不遊草木一何盛  
狹徑花將盡閒庭竹掃淨翠羽戲蘭苕頰鱗動荷柄  
念我平生好江鄉遠從政雲山阻夢思衾枕勞感詠  
感詠復何為同心恨別離世途皆自媮流俗寡相知  
賈誼才空逸安仁鬢欲絲遙情每東注奔晷復西馳

常恐填溝壑無由振羽儀窮通若有命欲向論中推

書懷貽京邑故人

惟先自鄒魯家世重儒風詩禮襲遺訓趨庭紹末躬  
晝夜常自強詞賦頗亦工三十既成立嗟吁命不通  
慈親向羸老喜懼在深衷甘脆朝不足簞瓢夕屢空  
執鞭慕夫子捧檄懷毛公感激遂彈冠安能守固窮  
當塗訴知己投刺匪求蒙秦楚邈離異翻飛何日同

遊雲門寺寄越府包戶曹徐起居

我行適諸越寤寐懷所歡久負獨往願今來恣遊盤

台嶺踐嶮石耶溪泝林端捨舟入香界登閣憇旃檀  
晴山秦望近春水鏡湖寬遠行佇應接卑位徒勞安  
白雲去久滯滄海竭來觀故國眇天末良朋在朝端  
遲爾同携手何時方挂冠

示孟郊

蔓草蔽極野蘭芝結孤根衆音何其繁伯牙獨不喧  
當時高深意舉世無能分鍾期一見知山水千秋聞  
爾其保靜節薄俗徒云云

山中逢道士雲公

春餘草木繁耕種滿田園酌酒聊自勸農夫安與言  
忽聞荆山子時出桃花源採樵過北谷賣藥來西村  
村烟日云夕榛路有歸客杖策前相逢依然是疇昔  
邂逅歡覲止殷勤叙離隔謂余搏扶桑輕舉振六翮  
柰何偶昌運獨見遺草澤旣笑接輿狂仍憐孔丘厄  
物情趨勢利吾道貴閒寂偃息西山下門庭罕人跡  
何時還清溪從爾煉丹液

歲暮海上作

仲尼旣已沒余亦浮于海昏見斗柄迴方知歲星改

虛舟任所適垂釣非有待為問乘槎人滄洲復何在

越中逢天台太一子

仙穴逢羽人停艦向前拜問余涉風水何事遠行邁  
登陸尋天台順流下吳會茲山夙所尚安得聞靈怪  
上逼青天高俯臨滄海大鷄鳴見日出每與仙人會  
來去赤城中逍遙白雲外莓苔異人間瀑布作空界  
福庭長不死華頂舊稱最永願從此遊何當濟所屆

自潯陽泛舟經明海作

大江分九派淼漫成水鄉舟子乘利涉往來逗潯陽

因之泛五湖流浪經三湘觀濤壯枚發平屈痛沉湘  
魏闕心常在金門詔不忘遙憐上林鴈水泮已回翔

早發漁浦潭

東旭早光茫渚禽已驚聒卧聞漁浦口橈聲暗相撥  
日出氣象分始知江路濶美人常晏起照影弄流沫  
飲水畏驚猿祭魚時見獭舟行自無悶况值晴景豁

經七里灘

余奉垂堂誠千金非所輕為多山水樂頻作泛舟行  
五岳追向子三湘吊屈平湖經洞庭濶江入新安清

復聞嚴陵瀨乃在此川路疊嶂數百里  
泓洄非一趣彩翠相氤氳別流亂奔澍  
釣磯平可坐苔磴滑難步猿飲石下潭  
鳥還日邊樹觀竒恨來晚倚棹惜將暮  
揮手弄潺湲從茲洗塵慮

南陽北阻雪

我行滯宛許日夕望京豫曠野莽茫茫  
鄉山在何處孤烟村際起歸鴈天邊去  
積雪覆平臯饑鷹捉寒兔少年弄文墨  
屬意在章句十上耻還家徘徊守歸路  
將適天台留別臨安李主簿

枳棘君尚棲匏瓜吾豈擊念離當夏首  
漂泊指炎齊江海非曠遊田園失歸計  
定山旣早發漁浦亦宵濟泛泛隨波瀾  
行行任艫柁故林日已遠羣木坐成翳  
羽人在丹丘吾亦從此逝

適越留別譙縣張主簿申屠少府

朝乘汴河流夕次譙縣界幸因西風吹  
得與故人會君學梅福隱余隨伯鸞  
蓮別後能相思浮雲在吳會送從弟邕  
下第後歸會稽

疾風吹征帆倏爾向空没千里去俄頃  
三江坐超忽

向來共歡娛日夕成楚越落羽更分飛誰能不驚骨  
送辛大之鄂渚不及

送君不相見日暮獨愁緒江上久徘徊天邊迷處所  
郡邑經樊登雲山入嵩汝蒲輪去漸遙石逕徒延佇

江上別流人

以我越鄉客逢君謫居者分飛黃鶴樓流客蒼梧野  
驛使乘雲去征帆沿溜下不知從此分還袂何時把

洗然弟竹亭

吾與二三子平生結交深俱懷鴻鵠志共有鶴鷄心

逸氣假毫翰清風在竹林遠是酒中趣琴上偶然音

夜登孔伯昭南樓時沈太清朱昇在座

誰家無風月此地有琴樽山水會稽郡詩書孔氏門  
再來值秋杪高閣夜無喧華燭罷燃蠟清絃方奏鷗  
沈生隱侯胤朱子買臣孫好我意不淺登茲共話言

宴鮑二宅

閒居枕清洛左右接大野門庭無雜賓車轍多長者  
是時方正夏風物自瀟灑五月休沐歸相携竹林下  
開襟成歡趣對酒不能罷烟暝棲鳥迷余將歸白社

峴潭作

石潭傍隈隩沙岸曉黃綠試垂竹竿釣果得查頭鮪  
美人騁金錯纖手繪紅鮮因謝陸內史葦蕖何足傳  
齒坐呈南山諸隱

習公有遺座高在白雲陲樵子見不識山僧賞自知  
以余為好事携手一來窺竹露閒夜滴松風清晝吹  
從來抱微尚况復感前規於此無竒策蒼生奚以為

與王昌齡宴黃十一宅

歸來臥青山常夢遊清都漆園有傲吏惠我在招呼

書幌神仙錄畫屏山海圖酌霞復對此宛似入蓬壺  
襄陽公宅飲

窈窕夕陽佳丰茸春色好欲覓淹留處無過狹斜道  
綺席卷龍鬚香杯浮馬腦壯林積脩樹南池生別島  
手撥金翠花心迷玉芝草談天光六義發論明三倒  
坐非陳子驚門還魏公掃榮辱應無間歡娛當共保  
同張明府清鏡嘆

妾有盤龍鏡清光常晝發自從生塵埃有若霧中月  
愁來試取照坐嘆生白髮寄語邊塞人如何久離別

夏日南亭懷辛大

山光忽西落，池月漸東上。  
散髮乘夜涼，開軒卧閒敞。  
荷風送香氣，竹露滴清響。  
欲取鳴琴彈，恨無知音賞。  
感此懷故人，中宵勞夢想。

秋宵月下懷

秋空明月懸，光彩露沾濕。  
驚鵲棲不定，飛螢卷簾入。  
庭槐寒影疎，鄰杵夜聲急。  
佳期曠何許，望望空佇立。

仲夏歸南園寄京邑舊遊

嘗讀高士傳，最喜陶徵君。  
日耽田園趣，自謂羲皇人。

余復何為者，栖栖徒問津。  
中年廢丘壑，上國旅風塵。  
忠欲事明主，孝思侍老親。  
歸來冒炎暑，耕稼不及春。  
扇枕北窓下，採芝南澗濱。  
因聲謝朝列，吾慕穎陽真。  
家園卧疾畢，太祝見尋。

伏枕舊遊曠，笙歌勞夢思。  
平生重交結，造此令人疑。  
冰室無暖氣，炎雲空赫曦。  
隙駒不暫住，日聽凉蟬悲。  
壯圖竟未立，班白恨無衰。  
夫子自南楚，緬懷嵩汝期。

田家元日

昨夜斗回北，今朝歲起東。  
我年已強仕，無祿尚憂農。



野老就耕去，荷鋤隨牧童。田家占氣候，共說此年豐。  
晚泊潯陽望香爐峯

挂席幾千里，名山都未逢。泊舟潯陽郭，始見香爐峰。  
嘗讀遠公傳，永懷塵外蹤。東林精舍近，日暮空聞鐘。

萬山潭

垂釣坐磐石，水清心益閒。魚行潭樹下，猿挂島藤間。  
游女昔解佩，傳聞於此山。求之不可得，泂月棹歌還。

入峽寄弟

吾昔與汝輩，讀書常閉門。未嘗冒湍險，豈顧垂堂言。

自此歷江湖，辛勤難具論。往來行旅弊，開鑿禹功存。  
壁立千峯峻，滾流萬壑奔。我來凡幾宿，無夕不聞猿。  
浦上搖歸戀，舟中失夢魂。淚沾明月峽，心斷鶴鴒原。  
離濶星難聚，秋深露易繁。因君下南楚，書此寄鄉園。

宿揚子津寄潤州長山劉隱士

所思在夢寐，欲往大江深。日夕望京口，烟波愁我心。  
心馳茅山洞，目極楓樹林。不見少微隱，星霜勞夜吟。  
送丁大鳳進士赴舉呈張九齡

吾觀鷓鴣賦，君負王佐才。惜無金張援，十上空歸來。

棄置鄉園老翻飛羽翼摧故人今在位岐路莫遲迴

送吳悅遊韶陽

五色憐鳳雛南飛適鷓鴣楚人不相識何處求椅梧  
去去日千里茫茫天一隅安能與斥鷃決起但槍榆

送陳七赴西軍

吾觀非常者碌碌在目前君負鴻鵠志嗟蛇書劍年  
一聞邊烽動萬里忽爭先余亦赴京國何當獻凱還

田家作

弊廬隔塵喧惟先養恬素卜鄰勞三逕植果盈千楮

粵余任推遷三十猶未遇書劍時將晚丘園日空暮  
晨興自多懷晝坐常寡悟冲天羨鴻鵠爭食羞鷄鶩  
望斷金馬門勞歌採樵路鄉曲無知己朝端乏親故  
誰能為楊雄一薦甘泉賦

從張丞相遊紀南城獵戲贈裴迪張參軍

從禽非吾樂不好雲夢田歲宴臨城望只令鄉思懸  
參卿有數子聯騎何翩翩世祿金張貴官曹幕府連  
歲時行殺氣飛刃爭割鮮十里屆賓館徵聲匝妓筵  
高標迴落日平楚壓芳烟何意狂歌客從公亦在旃

登望楚山最高頂

山水觀形勝，襄陽美會稽。最高惟望楚，曾未一攀躋。  
石壁疑削成，衆山比全低。晴明試登陟，目極無端倪。  
雲夢掌中小，武陵花處迷。暝還歸騎下，蘿月在深溪。

採樵作

採樵入深山，山深水重疊。橋崩卧杳擁，路險垂藤接。  
日落伴將稀，山風拂薜衣。長歌負輕策，平野望烟歸。

早梅

園中有早梅，年例犯寒開。少婦爭攀折，將歸插鏡臺。

猶言看不足，更欲剪刀裁。

澗南園即事貽皎上人

敝廬在郭外，素業唯田園。左右林野曠，不聞城市喧。  
釣竿垂北澗，樵唱入南軒。書取幽棲事，還尋靜者論。

王迥見尋

歸閒日無事，雲卧晝不起。有客款柴扉，自云巢居子。  
居閒好花木，採藥來城市。家在鹿門山，常遊澗澤水。  
手持白羽扇，脚踏青芒屐。聞道鶴書徵，臨流還洗耳。

與黃侍御北津泛舟

津無蛟龍患日夕常安流本欲避駘馬何知同鷁舟  
豈伊今日幸曾是昔年遊莫奏琴中鶴且隨波上鷗  
堤緣九里郭山面百城樓自顧躬耕者才非管樂儔  
聞君薦草澤從此泛滄洲

題長安主人壁

久廢南山田諫陪東閣賢欲隨平子去猶未獻甘泉  
枕席琴書滿褰帷遠袖連我來如昨日庭樹忽鳴蟬  
促織驚寒女秋風感長年授衣當九月無褐竟誰憐

庭橘

明發覽群物萬木何陰森凝霜漸漸水庭橘似懸金  
女伴爭攀摘窺礙葉深並生憐共蒂相示感同心  
骨刺紅羅被香粘翠羽簪擊來玉盤裏全勝在幽林

金

七言古詩

夜歸鹿門歌

山寺鳴鐘晝已昏漁梁渡頭爭渡喧人隨沙岸向江  
村余亦乘舟歸鹿門鹿門月照開烟樹忽到龐公棲  
隱處巖扉松徑長寂寥惟有幽人自來去

和盧明府送鄭十三還京兼寄之

昔時風景登臨地今日衣冠送別筵  
閒卧自傾彭澤酒思歸長望白雲天  
洞庭一葉驚秋早濺落空嗟滯  
江島寄語朝廷當世人何時重見長安道

送王七尉松滋得陽臺雲

君不見巫山神女作行雲  
霏紅沓翠曉氛氲  
嬋娟流入襄王夢  
倏忽還隨零雨分  
空中飛去復飛來  
朝朝暮暮下陽臺  
愁君此去為仙尉  
便逐行雲去不迴

鸚鵡洲送王九遊江左

昔登江上黃鶴樓  
遙愛江中鸚鵡洲  
勢逶迤繞碧

流鴛鴦鷓鴣滿沙頭  
沙頭日落沙磧長  
金沙耀耀動  
飈光舟人牽錦纜  
浣女結蘿裳  
月明全見蘆花白  
風起遙聞杜若香  
君行采采莫相忘

高陽池送朱二

當昔襄陽雄盛時  
山公嘗醉習家池  
池邊釣女自相  
隨粧成照影  
競來窺澄波  
淡淡芙蓉發  
綠岸粼粼楊  
柳垂一朝物變人亦非  
四面荒涼人住稀  
意氣豪華何處在  
空餘草露濕羅衣  
此地朝來餞行者  
翻向此中牧征馬  
征馬分飛日漸斜  
見此空為人所嗟  
殷勤

為訪桃源路予亦歸來松子家

五言律詩

與諸子登峴山

人事有代謝往來成古今江山留勝迹我輩復登臨  
水落魚梁淺天寒夢澤深羊公碑尚在讀罷淚沾襟

臨洞庭

八月湖水平涵虛混太清氣蒸雲夢澤波撼岳陽城  
欲濟無舟楫端居耻聖明坐觀垂釣者徒有羨魚情

晚春

二月湖水清家家春鳥鳴林花掃更落徑草踏還生  
酒伴來相命開樽共解醒當杯已入手歌妓莫停聲

歲暮歸南山

北闕休上書南山歸敝廬不才明主棄多病故人疏  
白髮催年老青陽逼歲除永懷愁不寐松月夜窓虛

梅道士水亭

傲吏非凡吏名流即道流隱居不可見高論莫能酬  
水接仙源近山藏鬼谷幽再來迷處所花下問漁舟

閒園懷蘇子

林園雖少事幽獨自多違  
向夕開簾坐庭陰落葉稀  
鳥從烟樹宿螢傍水軒飛  
感念同懷子京華去不歸

留別王維

寂寂竟無待朝朝空自歸  
欲尋芳草去惜與故人違  
當路誰相假知音世所稀  
祇應守寂寞還掩故園扉

武陵泛舟

武陵川路狹前棹入花林  
莫測幽源裏仙家信幾深  
水迴青嶂合雲度綠谿陰  
坐聽閒猿嘯彌清塵外心

同曹三御史行泛湖歸越

秋入詩人興巴歌和者稀  
泛湖同旅泊吟會是歸思  
白簡徒推薦滄洲已拂衣  
杳冥雲海去誰不羨鴻飛

遊景空寺蘭若

龍象經行處山腰度石關  
屢迷青嶂合時愛綠蘿閒  
宴息花林下高談竹嶼間  
寥寥隔塵事疑是入雞山  
陪張丞相登嵩陽樓

獨步人何在嵩陽有故樓  
歲寒問耆舊行縣擁諸侯  
泱莽北彌望沮漳東會流  
客中遇知己無復越鄉憂  
與顏錢塘登樟亭望潮作

百里雷聲震鳴絃暫輟彈府中連騎出江上待潮觀  
照日秋雲迥浮天渤澥寬驚濤來侶雪一座凜生寒

題義公禪房

義公習禪寂結宇依空林戶外一峯秀塔前衆壑深  
夕陽連雨足空翠落庭陰看取蓮花淨方知不染心

尋白鶴崑張子容隱居

白鶴青崑畔幽人有隱居塔庭空水石林壑罷樵漁  
歲月青松老風霜苦竹疎覩茲懷舊業携策返吾廬

九日

九日未成句重陽即此辰登高尋故事載酒訪幽人  
落帽恣歡飲授衣同試新茱萸正可佩折取寄情親

除夜樂城張少府宅

雲海訪甌閩風濤泊島濱如何歲除夜得見故鄉親  
余是乘槎客君為失路人平生復能幾一別十餘春

舟中晚望

挂席東南望青山水國遙舳舻爭利涉來往任風潮  
問我今何適天台訪石橋坐看霞色晚疑是赤城標  
遊精思觀迴王白雲在後



出谷未停午至家已夕曛迴瞻山下路但見牛羊群  
樵子暗相失草蟲寒不聞衡門猶未掩佇立待夫君

與杭州薛司戶登樟亭驛

水樓一登眺半出青林高帝幕英僚散芳筵下客叨  
山藏伯禹穴城壓伍胥濤今日觀溟漲垂綸欲釣鰲

尋天台山作

吾愛太乙子食霞卧赤城欲尋華嶺去不憚惡溪名  
歇馬憑雲宿揚帆截海行高高翠微裏遙見石梁橫

宿立公房

支遁初求道深公笑買山何如石嵒趣自入戶庭間  
苔澗春泉滿蘿軒夜月閒能令許玄度吟臥不知還

尋滕逸人故居

人事一朝盡荒蕪三徑休始聞漳浦卧奄作岱宗遊  
池水猶含墨山雲已落秋今朝泉壑裡何處覓蓀舟

姚開府山池

主人新邸第相國舊池臺館是招賢闢樓因教舞開  
軒車人已散蕭管鳳初來今日龍門下誰知文舉才  
夏日浮舟過滕逸人別業

水亭涼氣多間棹晚來過澗影見藤竹潭香聞芰荷  
野童扶醉舞山鳥笑酣歌幽賞未云遍旭光柰夕何

夏日辨玉法師茅齋

夏日茅齋裏無風坐亦涼竹林新笋穉籐架引稍長  
鷺覓巢泥處蜂來造蜜蜂房物華皆可觀花藥四時芳

與張折衝遊耆闍寺

釋子彌天秀將軍武庫才橫行塞北盡獨步漢南來  
貝葉傳金口山櫻作賦開因君振嘉藻江楚氣雄哉

與白明府遊江

故人來自遠邑宰復初臨執手恨為別同舟無異心  
泂洄洲渚趣演漾絃歌音誰識躬耕者年年梁甫吟

遊精思題觀主山房

誤入桃源裏初憐竹迳深方知仙子宅未有世人尋  
舞鶴過閒砌飛猿嘯密林漸通玄妙理深得坐忘心

尋梅道士

彭澤先生柳山陰道士鵝我來從所好停策夏雲多  
重以觀魚樂因之鼓枻歌崔徐跡未朽千載揖清波

陪姚使君題惠上人房得青字

帶雪梅初暖含烟柳尚青來窺童子偈得聽法王經  
會理知無我觀空厭有形迷心應覺悟客思不遑寧

晚春遠上人南亭

給園支遁隱虛寂養閒和春晚尋木秀關關黃鳥歌  
林棲居士竹池養右軍鵝花月北窻下清風期再過  
人日登南陽驛門亭子懷漢川諸友

朝來登陟處不似艷陽時異縣殊風物羈懷多所思  
剪花驚歲早看柳訝春遲未有南飛雁裁書欲寄誰

遊鳳林寺西嶺

共喜年華好來遊水石間烟容開遠樹春色滿幽山  
壺酒朋情洽琴歌野興閒莫愁歸路暝招月伴人還  
陪獨孤使君同與蕭員外證登萬山亭

萬山青嶂曲千騎使君遊神女鳴環珮仙郎接獻酬  
遍觀雲夢野自愛江城樓何必東南守空傳沈隱侯  
贈道士參寥

蜀琴久不弄玉匣細塵生絲脆絃將斷金徽色尚榮  
知音徒自惜聾俗本相輕不遇鍾期聽誰知鸞鳳聲  
京還贈張維

拂衣去何處高枕南山南欲狗五斗祿其如七不堪  
早朝非晏起束帶異抽簪因向智者說遊魚思舊潭  
題李十四莊兼贈綦母校書

聞君息陰地東郭柳林間左右瀍澗水門庭縱氏山  
抱琴來取醉垂釣坐乘閒歸客莫相待緣源殊未還

寄趙正字

正字芸香閣幽人竹葉園經過宛如昨歸臥寂無喧  
高鳥能擇木羝羊湯觸藩物情今已見從此願忘言

秋登張明府海亭

海亭秋日望委曲見江山染翰聊題壁傾壺一解顏  
歡逢彭澤令歸賞故園間余亦將奉史棲蓬共取閒

題融公蘭若

精舍買金開流泉遶砌迴芰荷薰講席松栢映香臺  
法雨晴飛去天花晝下來談玄殊未已歸騎夕陽催

九日龍沙寄劉大

龍沙豫章壯九日挂帆過風俗因時見湖山發興多  
客中誰送酒棹裡自成歌歌竟乘流去滔滔任夕波

洞庭湖寄閻九

洞庭秋正濶，余欲泛歸舫。莫辨荆吳地，唯餘水共天。  
渺瀰江樹沒，合沓海湖連。遲爾為舟楫，相將濟巨川。

和李侍御渡松滋江

南紀西江濶，皇華御史雄。截流寧假楫，挂席自生風。  
寮案爭攀鷁，魚龍亦避驄。坐聞白雪唱，翻入棹歌中。

秦中感秋寄上人

一丘常欲卧，三逕苦無資。壯上非吾願，東林懷我師。  
黃金燃桂盡，壯志逐年衰。日夕涼風至，聞蟬但益悲。

重訓李少府見贈

養疾衡茆下，由來浩氣真。五行將禁火，十步想尋春。  
致敬維桑梓，邀懽即故人。還看後凋色，青翠有松筠。

宿永嘉江寄山陰崔國輔少府

我行窮水國，君使入京華。相去日千里，孤帆天一涯。  
臥聞海潮至，起視江月斜。借問同舟客，何時到永嘉。  
上巳日洛中寄王迴

卜洛成周地，浮杯上巳筵。鬪鷄寒食下，走馬射堂前。  
垂柳金堤合，平沙翠幙連。不知王逸少，何處會群賢。  
聞裴侍御拙自襄州司户除豫州司户因以

投寄

故人荆府掾尚有栢臺威移職自樊沔芳聲聞帝畿  
昔余卧林巷載酒訪柴扉松菊無君賞鄉園嬾欲歸  
江上寄山陰崔國輔少府

春堤楊柳發憶與故人期草木本無意枯榮自有時  
山陰定遠近江上日相思不及蘭亭會空吟被襖詩  
送洗然弟進士舉

獻策金門去承歡綵服違以吾一日長念爾聚星稀  
昏定須温席寒多未授衣桂枝如已擢早逐鴈南飛

夜泊廬江聞故人在東林寺以詩寄之

江路經廬阜松門入虎溪聞君尋寂樂清夜宿招提  
石經山精怯禪林怖鷓棲一燈如悟道為照客心迷

宿桐廬江寄廣陵舊遊

山暝聽猿愁澹江急夜流風鳴兩岸葉月照一孤舟  
建德非吾土維揚憶舊遊還將數行淚遙寄海西頭

南還舟中寄袁太祝

汭泝非便習風波厭苦辛忽聞遷谷鳥來報五陵春  
嶺北迴征棹巴東問故人桃源何處是游子正迷津

東陂遇雨率爾貽謝南池

田家春事起丁壯就東陂  
殷殷雷聲作森森雨足垂  
海虹晴始見河柳潤初移  
余意在耕嫁因君問土宜  
行至汝墳寄盧徵君

行乏憇余駕依然見汝墳  
洛川方罷雪嵩嶂有殘雲  
曳曳半空裏溶溶五色分  
聊題一詩興因寄盧徵君

寄天台道士

海上來仙客三山望幾時  
焚香宿華頂裊露採靈芝  
屢踐莓苔滑將尋汗漫期  
儻因松子去長與世人辭

和張明府登鹿門山

忽亦登高作能寬旅寓情  
絃歌既多暇山水思彌清  
草得風先動虹因雨後成  
諺承巴里和非敢應同聲  
和張三自穰縣還途中遇雪

風吹沙海雪來作柳園春  
宛轉隨香騎輕盈伴玉人  
歌疑郢中客態比洛川神  
今日南歸楚雙飛侶入秦  
歲除夜會樂城張少府宅

疇昔通家好相知無間然  
續明催畫燭守歲接長筵  
舊曲梅花唱新正栢酒傳  
客行隨處樂不見度年年

自洛之越

遑遑三十載，書劍兩無成。  
山水尋吳越，風塵厭洛京。  
扁舟泛湖海，長揖謝公卿。  
且樂杯中酒，誰論世上名。  
歸至郢中作

遠游經海嶠，返棹歸山阿。  
日夕見喬木，鄉園在伐柯。  
愁隨江路盡，喜入郢門多。  
左右看乘土，依然即匪他。  
途中遇晴

已失巴陵雨，猶逢蜀坂泥。  
天開斜景遍，山出晚雲低。  
餘濕猶霑草，殘流尚入谿。  
今宵有明月，鄉思遠悽悽。

蔡陽館

日暮馬行疾，城荒人住稀。  
聽歌疑近楚，投館忽如歸。  
魯堰田疇廣，章陵氣色微。  
明朝拜嘉慶，須着老萊衣。  
他鄉七夕

他鄉逢七夕，旅館亦羈愁。  
不見穿針婦，空懷故國樓。  
緒風初減熱，新月始登秋。  
誰忍窺河漢，迢迢望斗牛。  
夜泊牛渚，趁薛八船不及

星羅牛渚夕，風送鷓舟遲。  
浦溆常同宿，烟波忽間之。  
榜歌空裏失，船火望中疑。  
明發泛湖海，茫茫何處期。



曉入南山

瘴氣曉氛氳南山沒水雲鯢飛今始見鳥墮舊來聞  
地接長沙近江從汨渚分賈生曾弔屈余亦痛斯文  
夜渡湘水

客行貪利涉夜裡渡湘川露氣聞香杜歌聲識採蓮  
榜人投岸火漁子宿潭烟行旅時相問潯陽何處邊

赴京途中逢雪

迢遞秦京道蒼茫歲暮天窮陰連晦朔積雪滿山川  
落鴈迷沙渚饑鳥噪野田客愁空佇立不見有人烟

宿武陵即事

川暗夕陽盡孤舟泊岸初嶺猿相叫嘯潭影侶空虛  
就枕滅明燭扣舷聞夜漁雞鳴問何處人物是秦餘  
同盧明府餞張郎中除義王府司馬海園作  
上國山河裂賢王邸第開故人分職去潘令寵行來  
冠蓋趨梁苑江湘失楚材預愁軒騎動賓客散池臺

落日望鄉

客行愁落日鄉思重相催况在他山外天寒夕鳥來  
雪深迷郢路雲暗失陽臺可歎悽遲子勞歌誰為媒

永嘉上浦館逢張八子容

逆旅相逢處江村日暮時  
衆山遙對酒孤嶼共題詩  
解宇鄰鮫室人烟接島夷  
鄉關萬餘里失路一相悲

送張子容赴舉

夕曛山照滅送客出柴門  
惆悵野中別殷勤醉後言  
茂林余偃息喬木爾飛翻  
無使谷風誚須令友道存

送張參明經舉兼向涇州省覲

十五綵衣年承歡慈母前  
孝廉因歲貢懷橘向秦川  
西座推文舉中郎許仲宣  
泛舟江上別誰不仰神仙

泝江至武昌

家本洞庭上歲時歸思催  
客心徒欲速江路苦迢迢  
殘凍因風解新梅變臘開  
行看武昌柳髮鬢映樓臺

唐城館中早發寄楊使君

犯霜驅曉駕數里見唐城  
旅館歸心逼荒村客思盈  
訪人留後信策蹇赴前程  
欲識離魂斷長空聽鴈聲

陪李侍御謁聰禪上人

欣逢栢臺舊共謁聰公禪  
石室無人到繩床見虎眠  
陰崖常抱雪松澗為生泉  
出處雖云異同權在法筵

和張丞相春朝對雪

迎氣當春立承恩喜雪來潤從河漢下花逼艷陽開  
不覩豐年瑞安知燮理才散鹽如可擬願糝和羹梅

送吳宣從事

才有幕中畫而無塞上勳漢兵將滅虜王粲始從軍  
旌旆邊庭去山川地脉分平生一七首感激贈夫君

送張祥之房陵

我家南渡隱慣習野人舟日夕弄清淺林端逆上流  
山河據形勝天地生豪酋君意在利涉知音期暗投

送桓子之郢城過禮

聞君馳絲騎躡蹠指南荆為結潘楊好言過鄢郢城  
標梅詩已贈羔鴈禮將行今夜神仙女應來感夢情

早春潤州送弟還鄉

兄弟遊吳國庭闈戀楚關已多新歲感更饒白眉還  
歸泛西江水離筵北固山鄉園欲有贈梅柳着先攀

送告八從軍

男兒一片氣何必五車書好勇方過我才多便起余  
運籌將入幕養拙就閒居正待功名遂從君繼兩踈

送元公之鄂渚尋觀主張駿鸞

桃花春水漲之子忽乘流峴首辭鮫浦江邊問鶴樓  
贈君青竹杖送爾白蘋洲應是神仙輩相期汗漫遊  
峴山餞房瑄崔宗之

貴賤平生隔軒車是日來青陽一觀止雲霧豁然開  
祖道衣冠列分亭驛騎催方期九日聚還待二星廻  
送王五昆季省覲

公子戀庭幃勞歌涉海沂水乘舟楫去親望老萊歸  
斜日催烏鳥清江照綠衣平生急難意遙仰鶴鴒飛

送崔易

片玉來誇楚治中作主人江山增潤色詞賦動陽春  
別館當虛敞離情任吐伸因聲兩京舊誰念臥漳濱  
送盧少府使入秦

楚關望秦國相去千里餘州縣勤王事山河轉使車  
祖筵江上列離別恨前書願及芳年賞嬌鶯二月初

送謝錄事

清旦江天迥涼風西北吹白雲向吳會征帆亦相隨  
想到耶溪日應探禹穴奇仙書儻相示余在灶山陲

洛下送奚三還楊州

水國無邊際，舟行共使風。  
羨君從此去，朝夕見鄉中。  
余亦離家久，南歸恨不同。  
音書若有問，江上會相逢。

送袁十嶺南尋弟

早聞牛渚詠，今見鶴鴒心。  
羽翼嗟零落，悲鳴別故林。  
蒼梧白雲遠，烟水洞庭深。  
萬里獨飛去，南風遲爾音。  
永嘉別張子容

舊國余歸楚，新年子北征。  
挂帆愁海路，分手戀朋情。  
日夜故園意，汀洲春草生。  
何時一杯酒，重與李膺傾。

送袁太祝尉豫章

何幸遇休明，觀光來上京。  
相逢武陵客，獨送豫章行。  
隨牒牽黃綬，離群會墨卿。  
江南佳麗地，山水舊難名。  
都下送辛大之鄂

南國辛居士，言歸舊竹林。  
未逢調鼎用，徒有濟川心。  
余亦忘機者，田園在漢陰。  
因君故鄉去，遙寄式微吟。

送席大

惜爾懷竒寶，迷邦倦客遊。  
江山歷全楚，河洛越成周。  
道路疲千里，鄉園老一丘。  
知君命不偶，同病亦同憂。

送賈昇主簿之荆府

奉使推能者，勤王不暫閒。  
觀風隨按察，乘騎度荆關。  
送別登何處，開筵舊峴山。  
征軒明日遠，空望郢門間。

送王大校書

導漾自嶓冢，東流為漢川。  
維桑君有意，解纜我開筵。  
雲雨從茲別，林端意渺然。  
尺書能不悵，時望鯉魚傳。

浙江西上留別裴劉二少府

西上浙江西，臨流恨解携。  
千山疊成嶂，萬壑合為溪。  
石淺流難泝，藤長險易躋。  
誰憐問津者，歲宴此中迷。

京還留別新豐諸友

吾道昧所適，驅車還向東。  
主人開舊館，留客醉新豐。  
樹繞溫泉綠，塵遮晚日紅。  
拂衣從此去，高步躡華嵩。

廣陵別薛八

士有不得志，悽悽吳楚間。  
廣陵相遇罷，彭蠡泛舟還。  
檣出江中樹，波連海上山。  
風帆明日遠，何處更追攀。

臨渙裴明府席遇張十一房六

河縣柳林邊，河橋柳泊船。  
文叨才子會，官喜故人連。  
笑語同今夕，輕肥異往年。  
晨風理歸棹，吳楚各依然。

盧明府早秋宴張郎中海園即事

邑有絃歌宰翔鸞狎野鷗  
眷言華省舊暫滯海池遊  
鬱島葳深竹前溪對舞樓  
更聞書即事雲物是新秋  
同盧明府早秋夜宴張郎中海亭

側聽絃歌宰文書游夏徒  
故園欣賞竹為邑宰來蘇  
華省曾聯事仙舟復與俱  
欲知臨汎久荷露漸成珠

崔明府宅夜觀妓

白日既云暮朱顏亦已酡  
畫堂初點燭金幌半垂羅  
長袖平陽舞新聲子夜歌  
從來慣留客茲夕為誰多

宴榮山人池亭

甲地金張宅一作甲第榮期樂自多  
櫪嘶支遁馬池一作甲第  
養右軍鵝竹引稽琴入花邀戴客過一作竹飲携琴  
山公時取醉來唱接離歌一作竹飲携琴

夏日宴衛明府宅

言避一時暑池亭五月開  
喜逢金馬客同飲玉人杯  
舞鶴乘軒至遊魚擁釣來  
座中殊未起簫管莫相催  
清明日宴梅道士房

林下愁春盡開軒覽物華  
忽逢青鳥使邀入赤松家

丹竈初開火仙桃正發花童顏如可駐何惜醉流霞  
寒食宴張明府宅

瑞雪初盈尺寒宵始半更列筵邀酒伴刻燭限詩成  
香炭金爐暖嬌絃玉指清厭厭不覺醉歸路曉霞生  
一云醉來方欲  
卧不覺曉雞鳴

和賈主簿并九日登峴山

楚萬重陽日群公賞燕來共乘休沐暇同醉菊花杯  
逸思高秋發歡情落景催國人咸寡和遙愧洛陽才

宴張別駕新齋

世業傳珪組江城佐股肱高齋徵學問虛簿濫先登  
講論陪諸子文章得舊朋士元多賞激衰病恨無能

李氏園卧疾

我愛陶家趣林園無俗情春雷百卉坼寒食四鄰清  
伏枕嗟公幹歸田羨子平年年白社客空滯洛陽城  
過故人莊

故人具雞黍邀我至田家綠樹村邊合青山郭外斜  
開軒面場圃把酒話桑麻待到重陽日還來就菊花  
途中九日懷襄陽



去國已如昨，倏然經杪秋。峴山不可見，風景令人愁。  
誰採籬下菊，應聞池上樓。宜城多美酒，歸與葛強遊。  
初出關旅亭，夜坐懷王大校書。

向夕槐烟起，葱蘢池館曛。客中無偶坐，關外惜離群。  
燭至螢光滅，荷枯雨滴聞。永懷蓬閣友，寂寞滯楊雲。

李少府與王九再來

弱歲早登龍，今朝喜再逢。何如春月柳，猶憶歲寒松。  
烟火臨寒食，笙歌咽曙鐘。喧闐雞道行，樂羨朋從。  
尋張五

聞就龐公隱，移居近洞湖。興來林是竹，歸卧谷名愚。  
挂席樵風便，開軒琴月孤。歲寒何用賞，霜落故園蕪。

張七及辛大見訪

山公能飲酒，居士好彈箏。世外交初得，林中契已并。  
納涼風颯至，逃暑日將傾。便就南亭裡，餘尊惜解醒。

題張野人園廬

與君園廬並，微尚頗亦同。耕釣方自逸，壺觴趣不同。  
門無俗士駕，人有上皇風。何必先賢傳，唯稱龐德公。  
過故融公蘭若

池上青蓮宇林間白馬泉故人成異物過客獨潛然  
既禮新松塔還尋舊石筵平生竹如意猶挂草堂前

早寒江上有懷

木落鴈南度壯風江上寒我家湘水曲遙隔楚雲端  
鄉淚客中盡歸帆天際看迷津欲有問平海夕漫漫

南山下與老圃期種瓜

樵木南山近林間北郭賒先人留素業老圃作鄰家  
不種千株橘唯資五色瓜邵平能就我開逕翦蓬麻

除夜

迢遞三巴路羈危萬里身亂山殘雪夜孤燭異鄉人  
漸與骨肉遠轉於僮僕親那堪正漂泊來日歲華新

傷岷山雲表上人

少小學書劍秦吳多歲年歸來一登眺陵谷尚依然  
豈意餐霞客忽隨朝露先因之問閭里把臂幾人全

賦得盈盈樓上女

夫婿久別離青樓空望歸粧成卷簾坐愁思嬾縫衣  
燕子家家入楊花處處飛空牀難獨守誰為解金徽

春怨

佳人能畫眉粧罷出簾帷照水空自愛折花將遺誰  
春情多豔逸春意倍相思愁心極楊柳一種亂如絲

閨情

一別隔炎涼君衣忘短長裁縫無處等以意忖情量  
畏瘦宜傷窄防寒更厚裝半啼封裹了知欲寄誰將

寒夜

閨夕綺窻閑佳人罷縫衣理琴開寶匣就枕卧重幃  
夜久燈花落薰籠香氣微錦衾重自暖遮莫曉霜飛

美人分香

艷色本傾城分香更有情髻鬟垂欲解眉黛拂能輕  
舞學平陽態歌翻子夜聲春風狹斜道含咲待逢迎

七言律詩

登安陽城樓

縣城南面漢江流江嶂開成南雍州才子乘春來騁  
望群公暇日坐銷憂樓臺晚映青山郭羅綺晴嬌綠  
水洲向夕波搖明月動更疑神女弄珠遊

歲除夜有懷

五更鐘漏欲相催四氣推遷往復迴帳裡殘燈纔有

燭爐中香氣總成灰。漸看春逼芙蓉枕。頓覺寒銷竹葉杯。守歲家家應未卧。相思那得夢魂來。

登萬歲樓

萬歲樓頭望故鄉。獨令鄉思更茫茫。天寒鴈度堪垂淚。月落猿啼欲斷腸。曲引古堤臨凍浦。斜分遠岸近枯楊。今朝偶見同袍友。却喜家書寄八行。

春情

青樓曉日珠簾映。紅粉春粧寶鏡催。已厭交懽憐憐枕。席相將遊戲繞池臺。坐時衣帶縈纖草。行即裙裾掃

落梅。更道明朝不當作。相期共鬪管絃來。

五言排律

西山尋辛諤

漾舟乘水便。因訪故人居。落日清川裏。誰言獨羨魚。石潭窺洞徹。沙岬歷絳徐。竹嶼見垂釣。茅齋聞讀書。款言忘景夕。清興屬涼初。回也一瓢飲。賢哉常晏如。

冬至後過吳張二子檀溪別業

卜築依自然。檀溪不更穿。園林三友接。水竹數家連。直取南山對。非關選地偏。卜鄰依孟母。共井讓王宣。

曾是歌三樂仍聞詠五篇草堂時偃曝蘭柀日周旋  
外事情都遠中流性所便閒垂太公釣興發子猷船  
余亦幽棲者經過竊慕馬梅花殘臘日柳色半春天  
鳥泊隨陽雁魚藏縮項鱖停杯問山簡何似習池邊

陪張丞相自松滋江東泊渚宮

放溜下松滋登舟命楫師寧忘經濟日不憚沍寒時  
洗憤豈獨古濯纓良在茲政成人自理機息鳥無疑  
雲物吟孤嶼江山辨四維晚來風稍緊冬至日行遲  
獵響驚雲夢漁歌激楚辭渚宮何處是川暝欲安之

陪盧明府泛舟迴峴山作

百里行春返清流逸興多鷁舟隨鴈泊江火共星羅  
已救田家旱仍憂俗化訛文章推後輩風雅激頽波  
高岸迷陵谷新聲滿棹歌猶憐不調者白首未登科

陪張丞相祠紫蓋山途經玉泉寺

望秩宣王命齋心待漏行青襟列冑子從事有參卿  
五馬尋歸路雙林指化城聞鐘度門近照膽玉泉清  
皂蓋依林憩緇徒擁錫迎天宮近兜率沙界豁迷明  
欲就終焉志恭聞智者名隨逝水歎波逐覆舟傾

想像若在眼周流空復情謝公還欲卧誰與濟蒼生  
臘月八日於剡縣石城寺禮拜

石壁開金像香山遶鐵圍下生彌勒見回向一心歸  
竹栢禪庭古樓臺世界稀夕嵐增氣色餘照發光輝  
講席邀談柄泉堂施浴衣願承功德水從此濯塵機

同獨孤使君東齋作

郎官舊華省天子命分憂襄土歲頻旱隨車雨再流  
雲陰自南楚河潤及東周解宇宜新霽田家賀有秋  
竹間殘照入池上夕陽浮寄謝東陽守何如八詠樓

峴山送朱大去非遊巴東

峴山南郭外送別每登臨沙岬江村近松門野寺深  
一言余有贈三峽爾相尋祖席宜城酒征途雲夢林  
蹉跎遊子意眷戀故人心去矣勿淹滯巴東猿夜吟

宴張記室宅

甲第金張館門庭軒騎多家封漢陽郡文會楚材過  
曲島浮觴酌前山入詠歌妓堂花映發書閣柳透迤  
玉指調箏柱金泥飾舞羅誰知書劍客年歲獨蹉跎

登龍興寺閣

閣道乘空出，披軒遠目開。  
逶迤見江勢，客至屢緣迴。  
茲郡何填委，遙山復幾哉。  
蒼蒼皆草木，處處盡樓臺。  
驟雨一陽散，行舟四海來。  
鳥歸餘興滿，周覽更徘徊。

登總持寺浮屠

半空躋寶塔，晴望盡京華。  
竹繞渭川遍，山連上苑斜。  
四門開帝宅，阡陌俯人家。  
累劫從初地，為童憶聚沙。  
一窺功德見，彌益道心加。  
坐覺諸天近，空香送落花。

與崔二十一遊鏡湖寄包賀二公

試覽鏡湖物，中流見底清。  
不知鱸魚味，但識鷗鳥情。

帆得樵風送，春逢穀雨晴。  
將探夏禹穴，稍背越王城。  
府掾有包子，文章推賀生。  
滄浪醉後唱，因子寄同聲。

本閣黎新亭作

八解禪林秀，三明給苑才。  
地偏香界遠，心靜水亭開。  
傍險山查立，尋幽石逕迴。  
瑞花長自下，靈藥豈須栽。  
碧網交紅樹，清泉盡綠苔。  
戲魚聞法聚，閒鳥誦經來。  
棄象玄應悟，忘言理必該。  
靜中何所得，吟詠也徒哉。

長安早春

關戍惟東漢，城池起北辰。  
咸歌太平日，共樂建寅春。

雪盡青山樹水開黑水濱草迎金埒馬花伴玉樓人  
鴻漸看無數鶯歌聽欲頻何當桂枝擢歸及柳條新  
秦中苦雨思歸贈袁左丞賀侍郎

為學三十載閉門江漢陰明歎逢聖代羈旅屬秋霖  
豈直昏墊苦亦為權勢沉二毛催白髮百鎰罄黃金  
淚憶峴山墮愁懷湘水深謝公積憤懣莊舄空謠吟  
躍馬非吾事狎鷗真我心寄言當路者去矣北山岑  
陪張丞相登荊州城樓因寄蘇臺張使君及  
浪泊戍主劉家

薊門天北畔銅柱日南端出守聲彌遠投荒法未寬  
側身聊倚望攜手莫同懽白璧無瑕玷青松有歲寒  
府中丞相閣江上使君灘興盡迴舟去方知行路難  
荆門上張丞相

共理分荆國招賢愧楚材召南風更闡丞相閣還開  
觀止欣眉睫沉淪拔草萊坐登徐孺榻頻接李膺杯  
始憫蟬鳴柳俄看雪間梅四時年籥盡千里客程催  
日下瞻歸翼沙邊厭曝鰓佇聞宣室召星象復中台  
和宋太史北樓新亭



返耕意未遂日夕登城隅誰謂山林近坐為符竹拘  
麗譙非改作軒檻是新圖遠水自蟠冢長雲吞具區  
願隨江燕賀羞逐府寮趨欲識狂歌者丘園一豎儒

夜泊宣城界

西塞沿江島南陵問驛樓潮平津濟潤風止客帆收  
去去懷前浦茫茫泛夕流石逢羅刹礙山泊敬亭幽  
火熾梅根治烟迷楊葉洲離家復水宿相伴賴沙鷗  
奉先張明府休沐還鄉海亭宴集

自君理畿甸余亦經江淮萬里音信斷數年雲雨乖

歸來休澣日始得賞心諧朱紱心雖重滄洲趣每懷  
樹低新舞閣山對舊書齋何以發佳興陰蟲鳴夜堦

同張明府碧谿贈答

別業聞新製同聲和者多還看碧谿答不羨綠珠歌  
自有陽臺女朝朝拾翠過舞庭鋪錦繡粧牖閉藤蘿  
秋滿休閒日春餘景色和仙鳧能作伴羅襪共凌波  
別島尋花藥迴潭折芰荷更憐斜日照紅粉艷青娥

贈蕭少府

上德如流水安仁道若山聞君秉高節而得奉清顏

鴻漸昇台羽牛刀列下班處臆能不潤居劇體常閒  
去詐人無諂除邪吏息姦欲知清與潔明月在澄灣

同王九題就師山房

晚憩支公室故人逢右軍軒窓避炎暑翰墨動新文  
竹蔽簷前日雨隨階下雲同遊清蔭遍吟卧夕陽曛  
江靜棹歌歇溪深樵語聞歸途未忍去携手戀清芬

上張吏部

公門世緒昌才子冠裴王自出平津邸還為吏部郎  
神仙餘氣色列宿動輝光夜直南宮靜朝趨北禁長

時人窺水鏡明主賜衣裳翰苑飛鸚鵡天池待鳳凰

和于判官登萬山亭因贈洪府都督韓公

韓公美襄土日賞城西岑結構意不淺品潭趣轉深  
皇華一動詠荆國幾謳吟舊徑蘭勿剪新堤柳欲陰  
砌傍餘恠石沙上有閒禽自牧豫章郡空瞻楓樹林  
因聲寄流水善聽在知音耆舊眇不接崔徐無處尋  
物情多貴遠賢俊豈遺今遲爾長江暮澄清一洗心

下瀨石

瀨石三百里沁泗千嶂間沸聲常浩浩洑勢亦潺潺

跳沫魚龍舞垂藤猿狖攀榜人苦奔峭而我忘險艱  
放溜情彌遠登艫目自閒暝帆何處泊遙指落星灣

行至漢川作

異縣非吾土連山盡綠篁平田出郭少盤壠入雲長  
萬壑歸於海千峰劃彼蒼猿聲亂楚峽人語帶巴鄉  
石上攢椒樹藤間養蜜房雪餘春未暖嵐解晝初陽  
征馬疲登頓歸帆愛渺茫坐欣汭溜下信宿見維桑

久滯越中贈謝南池會稽賀少府

陳平無產業尼父倦東西負郭昔云翳問津今已迷

未能忘魏闕空此滯秦稽兩見夏雲起再聞春鳥啼  
懷仙梅福市訪舊若耶溪聖主賢為寶卿何隱遁棲

送韓使君除洪府都督

述職撫荆衡分符襲寵榮往來看擁傳前後賴專城  
勿翦棠猶在波澄水更清重推江漢理旋改豫章行  
召父多遺愛羊公有令名衣冠列祖道耆舊擁前旌  
峴首晨風送江陵夜火迎無才慙孺子千里愧同聲

盧明一日峴山宴袁使君張郎中崔員外

宇宙誰開闢江山此鬱盤登臨今古用風俗歲時觀

地理荆州分天涯楚塞寬百城今刺史華省舊郎官  
共美重陽節俱懷落帽歡酒邀彭澤載琴輟武城彈  
獻壽先浮菊尋幽或藉蘭烟虹鋪藻翰松竹挂衣冠  
叔子神如在山公興未闌嘗聞騎馬醉還向習池看

宴崔明府宅夜觀妓

畫堂觀妙妓長夜正留宿燭吐蓮花艷粧成桃李春  
髻鬟低舞席衫袖掩歌唇汗濕偏宜粉羅輕詎着身  
調移箏柱促歡會酒杯頻儻使曹王見應嫌洛浦神

韓大侯東齋會岳上人諸學士

更步

邵守虛陳榻林間召楚材山川祈雨畢雲物喜晴開  
抗禮尊縫掖臨流揖渡杯徒攀朱仲李誰薦和羹梅  
翰墨緣情製高深以意裁滄洲趣不遠何必問蓬萊

初年樂城館中臥疾懷歸

異縣天隅僻孤帆海畔過往來鄉信斷留滯客情多  
臘月聞雷震東風感歲和蟄蟲驚戶穴巢鵲舐庭柯  
徒對芳樽酒其如伏枕何歸來理舟楫江海正無波  
上巳日澗南園期王山人陳七諸公不至

搖艇候明發花源弄晚春在山懷綺季臨漢憶荀陳

上巳期三月浮杯興十旬坐歌空有待行樂恨無隣  
日晚蘭亭北烟花曲水濱浴蚕逢姹女採艾值幽人  
石壁堪題序沙場好解紳群公望不至虛擲此芳辰

送莫氏甥兼諸昆弟從韓司馬入西軍

念爾習詩禮未嘗離戶庭平生早偏露萬里更飄零  
坐棄三冬業行觀八陣形飾裝辭故里謀策赴邊庭  
壯志吞鴻鵠遙心伴鶴鴒所從文與武不戰自應寧

峴山送蕭負外之荊州

峴山江岸曲郢水郭門前自古登臨處非今獨黯然

亭樓明落日井邑秀通川澗竹生幽興林風入管絃  
再飛鵬激水一舉鶴冲天佇立三荆使看君駟馬旋

送王昌齡之嶺南

洞庭去遠近楓葉早驚秋峴首羊公愛長沙賈誼愁  
土風無縞紵鄉味有查頭已抱沉痾疾更貽魑魅憂  
數年同筆硯茲夕異衾裯意氣今何在相思望斗牛  
五言絕句

宿建德江

移舟泊烟渚日暮客愁新野曠天低樹江清月近人

春曉

春眠不覺曉處處聞啼鳥夜來風雨聲花落知多少

送朱大入秦

遊人五陵去寶劍直千金分手脫相贈平生一片心

送友人之京

君登青雲去余望青山歸雲山從此別淚濕薜蘿衣

初下浙江舟中口號

八月觀潮罷三江越海濶回瞻魏闕路無復子牟心

醉後贈馬四

四海重然諾吾常聞白眉秦城游俠客相待半酣時

檀溪尋古

花半成龍竹池分躍馬溪田園人不見疑向武陵迷

同張將薊門看燈

異俗非鄉俗新年改故年薊門看火樹疑是燭龍燃

峴山亭寄晉陵張少府

峴首風湍急雲帆若鳥飛憑軒試一問張翰欲來歸

口號贈王九

日暮田家遠山中勿久淹歸人須早去稚子望陶潛

同儲十二洛陽道中作

珠彈繁華子金羈遊俠人酒酣白日暮走馬入紅塵  
尋菊花潭主人不遇

行至菊花潭村西日已斜主人登高去鷄犬空在家

張郎中梅園作

綺席鋪蘭杜珠盤折芰荷故園留不住應是戀絃歌

問舟子

向夕問舟子前程復幾多灣頭正好泊淮裏足風波

楊子津望京口

北固臨京口夷山近海濱江風白浪起愁殺渡頭人

北澗泛舟

北澗流恒滿浮舟觸處通泓洄自有趣何必五湖中

洛中訪袁拾遺不遇

洛陽訪才子江嶺作流人聞說梅花早何如此地春

送張郎中遷京

碧溪常共賞朱邸忽遷榮預有相思意聞君琴上聲

戲贈主人

客醉眠未起主人呼解醒已言鷄黍熟復道甕頭清

七言絕句

過融上人蘭若

山頭禪室挂僧衣  
窗外無人溪鳥飛  
黃昏半在下山路  
却聽泉聲戀翠微

涼州詞二首

渾成紫檀金屑文  
作得琵琶聲入雲  
胡地迢迢三萬里  
那堪馬上送明君  
異方之樂令人悲  
羌笛胡笳不用吹  
坐看今夜關山月  
思殺邊城遊俠兒

越中送張少府歸秦中

試登秦嶺望秦川  
遙憶青門更可憐  
仲月送君從此去  
瓜時須及邵平田

濟江問同舟人

潮落江平未有風  
輕舟共濟與君同  
時時引領望天末  
何處青山是越中

送杜十四之江南

荆吳相接水為鄉  
君去春江正渺茫  
日暮征帆何處泊  
天涯一望斷人腸



裴司士見訪前五言律中遺此今續之

府寮能枉駕家醞復新開落日池上酌清風松下來  
厨人具鷄黍稚子摘楊梅誰道山公醉猶能騎馬迴

鳳谷林愿一見朱了

